

賞雨茅屋詩集

序

自來文人學士一旦致身通顯而焚棄筆墨宗山詞章者比比皆是何哉珠服玉餽進於前齊謳楚舞陳於後蕩心蠱志則移於色聲者有之冒賄無藝固位是求則奪於名利者有之其或才識拘局迷悶簿書中日不暇給所謂一行作吏此事遂廢者又有之然則登高無賦手而從宦少詩人是秋蘭見敗於當門而夏蟲不可以語冰也若賓谷都轉處淮揚靡麗之區而澹於嗜欲依然寒素又能撥煩剖劇游又有餘公事餘閒時與賓從賦詩爲樂闢題襟館於署後周植花木爲唱和之所過

江名士躡屣而趨決擇旣精造詣益上屈指官斯土者  
自

國朝以來無慮數十輩而若風吹網所過無聞獨賓谷  
挾其縱橫跌宕之才以雄視乎當世令人愛之慕之比  
于香山六一玉局諸老不其偉與顧吾嘗讀其詩而知  
其所爲之不易也今夫耶谿之鋌赤山之精甚寶貴也  
然欲躍冶而求爲鑌錡則必使豐隆奮錐飛廉扇炭萬  
辟千灌而後蓮鈎鱗鋏神器乃成今請以賓谷之詩而  
援風胡子之說證之其體之廣大也如登高山臨深淵  
也其氣之奔放也巍巍翼翼如流水之波也其律之渾

灝而森嚴也如珠而不可枉也其音節之抑揚高下中  
宮中商也若流而不絕也而要其陰陽開闔歷變化呼  
喻而後發之者豈一日哉孔子云仕而優則學賓谷之  
于學蓋又渙矣余與君先人文木公爲同年生每憶君  
弱冠趨庭天骨秀發間示所業旁唐儵爚已如昆吾之  
出匣中今忽忽二十餘年乃得於紅橋白塔閒重附賓  
筵互爲酬唱而君成就之大已如是臨風搔首白髮飄  
蕭俯仰之間宛如隔世讀君集而敘之旣幸見君之盛  
而又惜余之老而將衰也錢塘吳錫麒撰

序

余序賓谷詩三年而不成賓谷訝之同游之士訝之余亦自訝之雖然余卒無以序賓谷詩乎哉今有以高一世之才空一世之氣早踐清華出膺臚仕據江山風月之勝兼文章賓客之能如是其於吾人遭際亦可必得乎曰不可必得矣今有處得爲之地蒙非意之干負饒樂不可勝之名抱詰屈不自存之慮隱憂顯責萃於前騰嘲竦誚交於後摧太牙角自同於庸駁裏奇橫雷轟腸腹如是亦有樂焉乎曰無所樂之矣以無所樂之心居不可得之境榮觀歲仍孤危日至繇是悄悄焉悄悄

焉有苑而結有萌而達有所可言不可言有所得言不得言有所欲言不欲言相雜起伏一息萬端而其所欲言可言得言者一旦得諸心而注諸手如泉焉咽乎谿衍之間屈折乎迴谿枉渚高高下下忽而墜壑爲渴驥爲怒貌如雲焉觸石而起蔽虧乎巖厓隔限乎林麓二色而靄三色而素五色而卿象爲牛馬或爲樓臺如風焉飄飄然起於無何有之鄉經乎廣漠薄乎畏佳盛怒乎土囊之口窳者叫窪者突白者喙忽而拔木蜚瓦排山倒海雨雪總至鬼神下來若然者自古詩人之遭也自古詩人遭之賓谷亦遭之然則世所羨賓谷而賓谷

所無以自申者天直以是往復磨厲成就賓谷而昌其  
詩賓谷爲人敏達而恢疏文字之好最篤其於文無所  
不能而講於詩者尤詳爲翰林曹郎不異諸生時爲轉  
運使不異翰林曹郎時今所錄存曰賞雨茅屋詩者裁  
八卷蓋其謹又如此咎有議歐陽氏窮而後工之說爲  
未足以盡詩人余獨不然夫窮非必以貧賤也有時富  
貴而窮乃窮之彌甚者也賓谷雖天性工詩非必有藉  
乎窮要凡所以往復磨厲成就之如此何一非天之所  
爲併氣積力以昌之而賓谷詩亦遂行天下其詩蓬勃  
也如風瀾漫也如雲澎湃也如泉讀者之所見也而所

有觸於石有咽乎谿有怒乎土囊之口者世或不具  
知余窮者徒也故遲之又久獨操歐陽氏之說爲之序  
雖固窮者之謫言哉後將有慨然而得古今之變者在  
於是嘉慶八年十月長洲王芭孫序



序

詩至於今夥矣盛矣操觚之士列韵之徒人自握珠家  
咸享帶雖華實殊尙豐約異觀類欲雄瞰末流高掩前  
哲羅入殯以喻廣引四瀆而比濫窮變於品彙撫奇於  
幽怪然而五章備采色分正間六律宣音聲別雅鄭燭  
龍懸照而熠燿亦逞其光雕虎炳文而狸狘或侔其貌  
乃至時工縱削而殷倖舍斤佚女弄姿而施媵歛衽往  
往然矣語其機杼內操規繩外立鬱爲文棟蔚爲詞宗  
者蓋未云數覲也賓谷先生蛟龍入懷星辰在手條貫  
列代包絡羣才自螭均橐筆 鳳闕陳書固已抒藻木

天熏香粉署洎持函蕩出理牢盆立縣蒞於淮東主敦  
槃於海內乃極一時之盛焉夫以綺歲振纓華州建纛  
而簿領少暇卽事縹緲嗜好俱恬獨耽嘯詠吮豪官閣  
盡日簾垂孽楮賓筵中宵燭燦非夙性由天英襟命世  
何能若此哉當其意牽今感胷觸古悲精思默往則雷  
電無聲神機驟來則弓刀自躍遂以吐納騷雅驅掃齊  
梁骨壯聲沈情辛味旨其蒼涼婉鬱馳騁偏反誠浣花  
之遺軌玉局之傑構也閒爲清峻之作時出流麗之篇  
能事非一餘技而已夫豫章千尋斯有翻風之勢餘艘  
萬斛斯有截海之能菴藺軒芋莫壯於平林蘭槩蓀橈

詎勝於巨浪是知才崇者力肆氣盛者詞充加以心穎  
密拙言泉細酌所以綱維衆製締創一家者乎釣願魚  
無網亡羊補牢薄游蕪城久依蓮府竇鞏附蘭亭之唱  
常以爲慙鄧魴喜香山之詩差有所見頃者辱問弁言  
辭不獲命輒竊其緒論助以妄談若夫東野苦吟俗韓  
名爲重宛陵窮句待歐敘而彰他日拙集裒成願以傅  
斯例也臨川樂釣謨

賞雨茅屋詩集目錄

卷之一

古今體詩九十首

卷之二

古今體詩六十七首

卷之三

古今體詩七十四首

卷之四

古今體詩六十二首

卷之五

古今體詩七十一首

卷之六

古今體詩一百七首

卷之七

古今體詩八十首

卷之八

古今體詩八十二首

卷之九

古今體詩六十四首

卷之十

古今體詩七十三首

卷之十一

古今體詩七十八首

卷之十二

古今體詩六十五首

卷之十三

古今體詩六十一首

卷之十四

古今體詩六十二首

卷之十五

古今體詩五十一首

卷之十六

古今體詩六十三首

卷之十七

古今體詩八十三首

卷之十八

古今體詩五十二首

卷之十九

古今體詩五十五首

卷之二十

古今體詩七十七首

卷之二十一

古今體詩七十二首

卷之二十二

古今體詩五十三首



當雨茅屋詩集卷之一

盱江 曾煥 賓客

古今體詩九十首

初發章江

江天望不極浩浩接彭蠡窮鄉一眇躬涉世此方始朝  
雲卷復舒暮雁落還起茫然信風帆怵惕靡所恃昨登  
滕王閣言念古先士子安方妙齡慷慨悲逝水文心  
何哀鬱鬱以天死人生不知命何處容吾趾

雜詩十五首

江河日千里上古憂涓天爲問發源處其流乃涓涓鵲

巢定風中蟻穴坏雨前化機恆甚微人意疏未然古事  
有徵驗庶幾攷陳編姬公妙觀象履霜識冰堅

北園有異卉凌冬發其華離離出霜雪灼灼麗雲霞陽  
和本何偏茲獨意所加松檜益老醜桃李無芳葩主人  
自怡悅過者徒驚嗟驚嗟未云已花色若矜喜豈料蛾  
眉讒謂是木妖耳翦伐其丹辭春工亦難恃

黃河天上來萬里挾風驚滾滾秋雪翻徂徕霹靂怒下  
滾不測底旁徙無恆處蛟螭喜得人葬骨詎知數請公  
無渡河公竟渡河去去者不能返來者復奔赴哀哀麗  
玉歌晨夕愴盈路

曉日綠楊陰風蟬方嘒嘒何來一黃雀悄向淡枝翳捕  
食宜已屢習此殊得計不知游俠兒挾彈且隨至美聚  
多刺棘甘瓜抱苦蒂懷哉古人心撲滿殷勤寄

鸚語得人憐鵲聲得人喜人生無辨才何由悅衆耳津  
津衛祝鮀截截淳于子用之雖害事聞之必稱美孔氏  
雕宰予猶云信於始

漢家寶車騎肺附本來親二十侍中郎三十統三軍甲  
明雞塞雪旗掃龍庭雲鼎狷山甫字碑刊班固文功成  
報天子錫爵兼賜緡長者執金吾幼者光祿勳偏裨封  
列侯諸校官舍人出入張羽葆樓臺耀金銀刺人屯衛

中奪業沁水濱宗藩不敢怨貴主不敢嗔徒言比衛霍  
衛霍豈其倫

吾愛草有藍雨露易爲植油油秀盈圃不異衆卉色采  
之盈一檐染衣遂成飾念彼唐棣華春來炫光澤羣芳  
各掩嫵宴賞窮日夕絕豔竟何成風雨自狼藉

幽壑始榮桂中途不植蘭託根不得地何以經歲寒昔  
有蔡中郎復聞陸平原乘風載清響高徹浮雲端鶴唳  
竟空憶蟬鳴悲昔彈始知丹穴鳳寄食唯琅玕

子房誦陰符少作諸侯客舌本何瀾翻如以水投石偶  
遭赤帝子一見莫之逆進言良甚難知言豈易得或云

關運命聞者彌歎息

君子有嗜好與俗殊酸鹹易牙調五味迺獨投所甘  
絲豈能織野馬不可驂蘭形而棘心妖麗惑魯男惜哉  
一念蔽詎免終身慙

士能闢二氏是亦孟子徒闢之而不勝所病非真儒吾  
觀佛老言心超萬物初矯矯絕聲利亦足矜庸愚學禪  
若澄什學道如李少君盧生後起失厥意初祖不受誣  
僞學久益滋浸假爲奸汙但當人其人未可焚其書爲  
儒不修行流弊復何如

何處行路難巍巍太行山夸娥不能負疊石霄漢間夜

凝斗杓轉朝愁日車翻嶙困復犖确百步千迴環穆王  
駕八駿到此猶摧顏誰來齎重貲偃蹇驅駑頑一蹶鞭  
不起良樂爲悲潛嗟嗟非爾罪爾力誠已殫

吾觀水無心遇物皆委順鑒真由內足德大乃旁潤由  
由風與俱澹澹月相印非無赴谷勇終俟盈科進衛郊  
五丈夫負缶勞其軀汲灌輒終日不盈韭一區停車有  
鄧析教以操轆轤一笑謝君子忘機存我愚

長歌遠遊曲載誦輕舉篇九州何偏側雙翼能飛翩朝  
從鬱儀轉夕共結璘旋飢餐瓊藥香渴飲沆瀣鮮仙官  
不隸屬遊戲以長年俯首窺蓬瀛渺若數點煙因怪西

王母何爲在人閒

人生累衣食各有別離端不怨君遠行但悲行路難苦  
境皆自知難爲室人言君歸縱能信展轉不獲安何如  
老萊子有田耕蒙山委畚辭楚相妾心非所慳

十六國小樂府

前趙

白魚來鳳凰集赤龍去犬豕入司馬家兒家難多君家  
骨肉復如何遮須夷國常虛位不似人閒紛變置

後趙

石言趙昌石徙趙亾發石太武葬石臨漳破車有犢負

魚有羊誰噬虎腦維虎生狼

前燕

冠步搖禮章甫鑄銅駟鞭石虎太原王死吳王去六璽  
三臺歸草付悲哉欲死先人墓

前秦

東海大魚化爲龍食蒲應夢都關中興衰始末因慕容  
收馭執曄歸牢籠益州涼州盡提封意氣六合無豪雄  
雪掃東井經太微魚羊食人人不知尾長翼短阿得脂  
投鞭便欲填淮淝風聲鶴唳徒驚疑鳳凰已占梧桐枝  
五將山中長得之此時緩急語阿誰



後秦

龍驤建業君所賜請君法堯禪舜位有虞安得此苗裔  
鬼哭新平寺僧聚逍遙園不審符姚因果如何言鎮惡  
千軍夾渭水可憐佛念投牆死

蜀

江橋頭闕下市成都北門十八子歲在元宮自相剋桓  
溫不慮攻難得往時常笑劉益州失卻天險真庸流如  
何三十載讖又符譙周安樂公歸義侯

前涼

起家臥龍城敗家神雀觀家法竟不終河西亦多難北

伐疏何慷慨  
符命傳何夸  
張春秋一部成  
前涼北山楊樹生  
松葉君可爲人臣妾  
不爲人妾

西涼

南通傳檀北蒙遜  
彈丸黑子酒泉郡  
厥考述志詞何悲  
兒不自守而乃伐人  
爲有葛縣縣槐鬱鬱  
異哉仙李他

年發

李歆死後有子重耳奔江左後歸魏爲唐高七世祖

北涼

東稱藩北稱藩  
涼三十年若七年

後涼

童瞳子非常人  
積戈躍馬趨玉門  
玉門已西萬餘里  
名

王盡拜重瞳子歸自家號三河王龍瑞麟祥作年紀重  
瞳子婆樓有子君無兒言猶在耳憂兄弟兄弟桓桓竟  
負之

後燕

鷹不可縱虎不可馴雀入燕室魚羊食人得脂得脂博  
勞舊父長鞘馬鬣擊其左股擊左股登中山八萬騎莽  
天門閒鳴梟食母一何暴月化爲龍非鼠盜

南涼

宣德堂中正酣燕傳檀仰屋而三歎此堂中夏十二主  
作者不居悲古語古語誠可悲悲君更有誰

南燕

有德者昌無德人亡徒河氣數三興王先庚後庚何不長  
西秦

紇千山頭雀東飛西飛生處樂何異五谿梟鳥惡

北燕

天門啟雲氣生婦人御宇入龍城龍城婦人一何豔驪  
姬方死宋姬爛女化爲異臣作君雖有兄弟曾不如他  
人鼠渡水西狼噪城外佛狸有馬盧龍無塞畢萬之後  
不復大

夏

統萬城邊萬夫血鐵伐伐人銳如鐵射狐不中鐵終折  
十國小樂府

吳

隋楊枯盡吳楊起廣陵楊花飛不止此樹笑爲常化李

南唐

如何青葛帷易以紅羅壁花發蓬萊紫衣成天水碧檀  
來歌後五來歌宛洛軍聲頻渡河南朝自昔有同調不  
誦瓊枝卽貝多

前蜀

王八來桑柘罄王一來煙花盛奉太后從太妃冠金冠

衣雲衣翔禿鶩舞回鶻入草人入草物

後蜀

呼孟入題孟德前王灑翰延瓊壁榜趙主書趙民後王  
帖子標長春蜀中文字何靈詭天道微茫有如此笑他  
降表推李家悲絕宮詞誦花藥

南漢

不爲洛州刺史且作風流天子風流天子何可長執挺  
願先去聲諸降王宴罷紅雲來白雨珠堂玉殿成焦土

楚

天策府裏丹沙香會春園中蘭麝芳主人平安坐八牀

夏立銅柱排銀槍東海鯉魚忽飛起羊子離羣復馬子  
龍舉頭豸掉尾

吳越

龜頭官家狗腳朕鑪中兒輩紛紛盡傷舍錢生員異人  
開門節度長安枕公府不肖填西湖大第他時臨汴渠  
可憐一局畱南宋浙臉還徵宮掖夢

閩

父開門節度使兒閉門假天子父爲佛金輪王兒爲仙  
事寶皇父曾騎馬來兒復騎馬去村有桃林禾港有甘  
棠樹

荆南

左蠻右觸雲翻雨覆飴糠及米掠脂幹月無賴之人竟  
策高足

北漢

雕青天子居然有自在將軍空復走臺駘澤畔雪紛紛  
赤真人來一夜春一夜春重午節汾陽火似咸陽焚

哀鴻詩

哀鴻不得食逝彼天一方努力將其雛終焉棄道傍豈  
無顧復意自念就死傷同死不忍見見之摧心腸不如  
姑棄置萬一生可望其雛宛轉鳴四野爲悽愴



哀鴻不得食餓死在林麓旁復有羣鴻餐此死者目豈  
不傷其類生者暫充腹寧知究不免道路且相續

謁岳武穆王祠

塞外方愁馬角生小朝廷已定和盟夫差久自忘於越  
樂毅何能下莒城十載功銷三字獄一時哭徧兩河兵  
九原相見宗畱守幾許英雄熱淚傾

雨泊

慣道朔方苦不知江上寒兩旬淡霧雨孤艇落風湍颯  
颯蘆聲亂幢幢燭影殘關心慈母綫生怕客衣單

伊孝廉墨卿與余話舊感向者東郡之游而見於

詩黯然奉答

昔游如夢思茫茫語向君前倍感傷樓上酒人明月夜  
雪中詩話聚星堂雛鴉畏晚尋巢急孤樹驚秋落葉涼  
莫問少陵舊詩卷不堪東郡弔城荒

曉過劉諫議祠

文章多忌諱非獨直言難況效賈生哭空悲湘水寒曙  
烏嘯屋角殘月挂林端當日崇祠廟如聞待驛官

居庸關

九州奇險處從古有人平此地扼幽朔幾朝經戰爭風  
高酣萬谷雲重壓層城海外今騷動何由卻請纓

時臺  
灣告

警

宿懷來縣城外

孤城懸塞外孤客耐寒宵月上高山小風來大漠囂處  
窮身合賤嘗險氣渾銷忽念從軍苦戈船渡海遙

賀雨

維夏四月歲戊申吾

皇下詔憂斯民

詔云雨澤久愆候爲民請命宜躬親朕率有司敢昭告  
上帝其鑒予一人桑林一禱應若神詰朝三尺甘膏均  
羣臣稽首賀

賞雨茅屋詩集

卷之一

十

陛下

陛下誠意通蒼旻詎知感召不唯是臣燠敬請言其因前者吾

皇慮艱食京師平糶千百困昨聞郡國告荒歉緩徵逋賦頒新綸更宣司寇理畱獄欲令圜狴無哀呻此皆至德動天鑑

聖主豈獨修精禋從今嘉瑞來應旬歲歲大有書史臣不須更說白居易詩陳賀兩元和春

哭兄五首

科名定何物而能使人死得之猶一呷不得迺至此哀

君二十年託命毛錐子西風無限淚滴作硯池水儒冠  
竟誤身今日長已矣已矣平生心以誰爲知己

與君爲兄弟君長我四年聰明異姿稟人謂伯也賢從  
君就塾師先我君著鞭弱齡十有五名補弟子員青紫  
同拾芥謂在指顧間聞之我母云君生非偶然誕君彌  
厥月祖母方夜眠夢有青長蚪矯首堂東偏明日抱孫  
喜頭角真嶄然望君大門戶君命何述邇我才不如君  
乃忝科第先

君性篤天顯師友親伯仲推讓及衣食撫摩到疾痛先  
君蚤見背所恃憂患共我母年漸高甘旨況屢空兒輩

尙童癡未供典謁用兄念鞠子哀微名安足重云何一朝忿貽我如剡慟可憐春草生猶此西堂夢

憶君癸卯秋應舉在鄉國報罷還北來幾使蛟龍得兄

於鄱陽湖覆舟

聞信一駭絕喜君有福澤平地倏波濤幽明竟

睽隔天乎抑人耶此理未能識人言君近年佞佛頗滋惑浮名不能空佛法何所擇哀君更惜君唯有淚沾臆思君不能寐夜夢見君顏縱談極瑣屑無異平生歡歡極夢忽迴搥牀但長歎地下儻有知悔恨真漫漫庶幾來生緣更吹簫與壘蚤年博科第以破今生慳

哭妹

哭兄九月望汝已在牀簀汝哭不成聲汝命又何迫

妹卒

於十月二日

贅壻淹一期翁姑未曾識生子纔四旬乳哺未

能覓恩恩一世人豈但如過客念汝聰慧性鮑妹才可  
敵識字憂患始善懷自貽戚萬事不聽天人情曷有極  
閔予遭多難惴惴老母側恐益老人悲吞淚暗悽惻汝  
與兄若此何以慰孃憶明年歸汝喪魂依黃氏窆

### 悼黃甥

異哉汝又死夏非我所期血淚餘幾何淋漓盡於斯汝  
生未兩月汝母驟見遺汝父又南還死別兼生離無依  
依乳嫗汝尙懵不知汝誕彌厥月吾母爲歡怡金盤與

綳子爲汝摒擋之近日悼汝母見汝輒涕洟汝何生不  
辰一病復長辭汝母有殯宮附葬於汝宜夜臺就懷抱  
不解人間悲凶災慘相繼我慟何能持養汝不成人我  
愧還復滋

登盤山

雄關壓烏桓巨障當赤緊勢窮滄海迴色與碧天盡入  
山皆怪石徧地無土墳石縫取微徑流泉若相引初聞  
細竇中幽響咽秋蚓漸驚遠峯際晴晝雷殷殷漫天翻  
雪車奔澗下虹勒豈其析木津此去泛槎近頑石忽玲  
瓏水鑿其渾沌剗鐫窮萬變巧匠謝不敏蹴踏或獅象



騰拏或蛟蜃時時趁人來奮角張口吻其罅多生松小  
者如迸筍大者出拗枝奮怒不能忍高材久抑鬱逸態  
彌偃蹇風濤雜泉聲洶洶萬壑憤耳目紛可愕登降了  
無滓甫欣出坎夷又駭面壁窘側身千仞淵一墜必齧  
粉闌跂復支離自笑類無脈絕嶺更緣棧細於溝上吟  
斗旋當礙杓日馭恐側軫有石倒懸空欲隕而未隕裊  
裊瓜絡架累累鐘在簏不知九霄上誰繫以長紉更有  
一磐石微根若芝菌其重可千鈞烏獲愁絕臙一指輒  
搖動推詳理難允石閒開兩潭日月象天睽聞爲龍所  
蟠未敢輕嗽吮浮圖裊當風岌岌如未穩憑闌一俯眺

來路窮飛隼茲方本良維星次辰主賢茲山水石奇故  
是真精蘊幽都形勝地倚此作門闢川原莽轆轤都邑  
紛殷賑秦帝築長城唐宗屯甲盾得失何紛紜萬古一  
朝槿緬唯廣成子大道得元牝空桐今在望羽節或當  
返又聞田先生于茲曾卜隱吾何爲出山與俗同蠢蠢

彭祖觀井歌

汴流交泗趨彭城城西有井傳老彭觀井之說吾何憑  
其圖見之陳靖銘井闕旁有高樹青背樹而立束以繩  
兩手扶杖身爲凭此時窺井猶兢兢吁嗟此情宜服膺  
人心所忽災害乘沮洳常阻騏驎行世閒健者頗絕矜

海潮可弄河可馮何況區區溝澮盈老彭對之謝未能  
波瀾不起水一泓視若長江與滄溟萬一失足吁可驚  
危哉虎尾同春冰嗟予賦命賤且輕少年意氣殊縱橫  
乘風欲奔萬里程邇來歷事多變更但見險處心忪忪  
常行不敢踰谿阨誦彭祖事尤當懲吾聞世有彭祖經  
其辭亶亶論養生又嘗茹芝餐桂英故井疑有丹沙凝  
所願服之延百齡

和劉澄齋同年聞蟬

此聲何苦太纏綿似有幽懷鬱不宣院落微涼疏雨後  
陂塘森木夕陽天一官清冷思田舍兩鬢蕭騷感歲年

幾處高枝棲得穩中郎心悸在琴絃

七月八日潞河買舟寄兄妹兩棺歸葬哭以詩

萬里秋風冷歸魂恐不禁繁霜慈母髮哀雁弟兄心已斷  
今生愛難將遠夢尋新阡誰爲掃淚滴潞河波

木蘭從獵酬曹儼笙同年寄懷原韻

河如隴坂羊腸曲

木蘭有河名羊腸

天似穹廬雁塞寬曉拂霜

華于帳溼夜明獵火四山寒才非獻賦空操管

恩許分鮮每壓鞍不負此行緣底事丹崖碧樹飽經看

十二月二十八日得朝鮮檢書朴齊家音問以詩

答之并寄桺檢書得恭

客自扶桑外傳來尺素書滄波天共遠風雪歲將除奉  
表曾充使言詩數起予因君煩問訊桺惲近何如桺賞  
借朴

奉使  
來都

### 除夜

### 禁中宿直

斗柄初迴鳳闕閒松盆徹夜照清班

九重偏覺春先到萬戶誰如我最閒南畝占年翻雪壤  
西師送喜過天山書生何補昇平業歲月催人鬢自斑

### 仇實父上林圖歌

仇實父汝視明武宗才何如漢武豹房居野外非有離

宮一百四十五日日前驅鼓嚴簿臂鷹牽犬出宣府當時諫獵寧無人未讓相如獨千古不因廷杖斃便遣蠻荒去曷若賦上林猶蒙天子許實父心傷之丹青寫出賦中語丹青著紙何太華上林景物原窮奢頗閤袁氏好園圃坐以重罪籍其家珍禽奇獸盡沒入紫鴛青兕紛騰擎又聞羣臣進文杏輪杞三千餘樹皆名葩葡桃何以致西域博望槎荔枝何以植南越通邛巴千軍萬夫竭力供一苑瑰寶那不窮幽遐大魚吐珠來祥麟應弦獲百靈猶獻媚驕泰宜已極豈知黎首困徭役但見羽旄皆蹙額他時雖罷珠崖兵千秋富民已無策我

思漢高明祖始開國逐鹿中原苦費力守成何必有雄  
才文景仁宣真令辟兩朝衰盛大轉關祇繫元封與正  
德

浮漚篇

波心窪復埳一雨千漚發乍如珠走盤散亂不可撮又  
如星流天明滅何太忽乾坤一虛氣有象仍恍惚頗聞  
元會終究竟歸無物矧茲萬物生得氣祇豪末嘗觀馬  
噴泉更見魚吹沫磨墨花旋漂沸鼎火初活種種爲浮  
光須臾已銷歇水爲氣之母有感必宣達逝者乃如斯  
信知盈易竭人猶恃所長欲與造化奪我思學神仙託

迹金銀闕聞在大海中竊愁俱蕩沒

邊詞

陽春不到處萬馬雪山風此地一迴首崑崙猶極東  
縈幽勞鄧艾轉餉藉蕭公蕭何稱蕭公見東都賦誓掃邊氛淨行將

西海窮

澄齋招飲借園賞花次韻爲謝

春殘十日行將歸如駒過隙誰能戰主人惜春對花飲  
淋漓不顧沾春衣後庭絳樹豔殊絕爛如繡幃三尺圍  
不教紅衷席閒舞恐驚香雪簾前霏長安三月數花事  
游客多款僧家扉卻嫌蓮社嚴酒禁鐘魚報晚常忍飢



豈如主人能醉客夜闌秉燭星光稀兩閒逆旅人借耳  
戚戚寒餓爭輕肥百年虛度皆可惜仙杖莫逐金烏飛  
主人借園客借飲蒙莊之旨何其微

生者假借也  
語見莊子

### 題韓蘄王湖上騎驢圖

官家甘作湖山主蓋世英雄皆不武龍庭萬里悲塵沙  
驢背十年老煙雨使臣奉表渡黃河百戰江淮終柰何  
幸不冤魂沈獄底得畱華髮照湖波一僮攜酒一隨側  
策蹇湖邊任南北猖狂敢復如灌夫款段猶堪傲新息  
此身孤負舊時勳但試摩抄刀箭痕西蜀不聞迎太上  
北平安用起將軍鳴乎王也誠樂此詎識西湖亦禍水

平章游後王氣終立馬吳山人至矣

橫山丙舍圖爲秦小峴侍讀題

七年孝子淚染出毘陵山霜露與時積松楸何日攀我

思茅舍在常傍黎江灣歲歲杜鵑發掃阡人未還

余祖墓在

黎江上歲以清明拜掃徧山皆杜鵑花也

爲小峴題蒲團小影

怪君鶴骨瘦峻嶒日日清齋酒數升自道夢中曾打坐

芙蓉巖上一龕僧

小峴嘗夢跣趺石壁間上有芙蓉巖三字

飲錢裴山灤陽客舍賦得餅荷

芙蓉裳在負歸期十載風塵兩鬢絲河朔偶逢沈李會

江南正是采蓮時夕陽山館含清氣秋水蘭橈入遠思  
把酒醉花須愛惜塞垣能有幾花枝

七月初三日女弟朱靈觀南歸予在灤陽不獲一  
送以詩哭之

生死依慈母

妹自贅壻以來未歸其家

還鄉祇片魂姑賢會未識兒

幼始能言有命安寒素無醫審病源可憐人一世唯是  
數朝昏

兄妹去年葬汝喪今日歸如何天際雁歲歲失羣飛將  
母心難慰愁予鬢漸稀秋風潞河水極目淚沾衣

送章石樓之官畿輔

淹茲塵土十年餘試可畿封百里初冰合桑乾征騎去  
雪濞燕市酒人疏頗聞鴻雁哀難息況有萑苻盜未除  
君往須稽循吏傳客來休忘故交書

寄吳白菴

廣文先生今鄭虔有才三絕無一錢前年上書不得意  
挂帆飛渡巴陵煙巴陵煙開庾樓月庾公宴客笙歌發  
謂畢秋帆制府漢江一醉三百杯落筆波瀾與江濶卻乘黃鶴

還故鄉故鄉妻子飢且僵勸君俯就升斗祿需次從此  
居南昌而君落拓猶故常聞君東湖之浹賃華屋推與  
貧交同信宿堂中食客常百人不計廣文飯不足懷中

安得餘琅玕盤裏從來厭苜蓿  
吾儕豪氣窮不衰黃金到手輒盡之  
平生浪說買山隱徒有空囊誠可哂

題墨雲軒詩藁誌感

吾師魯後齋先生之女敬莊所作

曾作中郎門下士蚤知才女辨琴絃  
焦桐冷落今何在髣髴遺音此一編

贈嶺南李孝廉

峯

君從滄海上來操子春琴寥落風塵裏  
誰知山水心梅花香夢遠雪夜客廬淡  
感遇因成詠悠然寄古音

瓦歎壺

喁然無口匏坎其細腰鼓  
數多死渾沌耳漏襲神禹量

豈涵江湖才非折樽俎所期潤草木用汝作霖雨病葉  
生機微治之妨莽鹵汝不虞屯膏且可資與與我有半  
畝園雜花方憚暑注茲試滿中一手力能舉風前雨絲  
絲葉上露漚漚此時此一壺價欲千金取終焉傾易竭  
壘恥亦云屢汝器如漏卮汝質誠瓦釜

龍鬚席

穆王去後無龍駒海山猶復生龍芻世間凡馬不能食  
泉客取之織爲席炎天攜到日停午匡牀八尺疑風渚  
夢持餅水驅雲雷一滴馬鬣天下雨覺來日射西窗明  
蚊蚋遠避蠅無聲門外煩歆正難觸此時願睡不願醒

龍鬢之拂龍皮扇豪華倏忽吾無羨  
便將乘此朝玉京  
日與安期游汗漫

題徐閩齋芙蓉湖上讀書圖

美人住湖上  
豔奪芙蓉花  
今日芙蓉發  
美人天一涯  
予曾汎黃浦  
風雨片帆斜  
岸側聞吳詠  
焉知君所家

贈王述菴侍郎得告歸里

纔看飛旆觀明光

去年侍郎假滿赴都經過邗上

旋報歸田許侍郎一

代勳名在麟閣五湖煙水占漁莊

侍郎有三後身自是漁莊圖

後身自是

如來佛

侍郎署書室日蒲褐山房又有內宗梵行小印故云

名士多從弟子行他

日吳中成洛社白頭司寇醉吟長

和人白蓮

暑風吹不熱秋水澹無痕一夕清輝照滿湖  
香露繁遠公修淨土謝客沁詩魂示我天然妙  
知君般若門  
不露孤高氣而成清淨根亭亭此焉植澹澹復何言  
銷盡湖中豔醒來月下魂相憐貞女意縞袂坐黃昏

題伍節母篝燈課子圖

先人失怙睟盤初常說篝燈母授書  
先君未週歲而孤  
先祖母苦節教讀  
今見畫圖一悽愴松聲竹影似吾廬

送黃賁生北上公車

衣上去年淚鬢邊明日塵人隨歸雁遠花待禁城春遇



次未能詳

客有維摩詰還逢天女來看經尋常室題字  
出虛堂靜息生洞壑哀試參海雲法吾亦厭塵埃  
雙闕闢松寥長通上下潮乾坤何代畫日月此中跳人  
迹無從到禽聲盡意囂臨江難久竚寒籟晚蕭蕭  
月出空江白歸途景更清浮槎天漢近吹笛水風輕  
火初生岸樓陰漸下城何殊游赤壁一賦尙能成

眞州淮堤菴老梅行

白沙江村有老梅百年劫火餘枯菱春風一夜忽鼓動  
玉筍旁迸千枝開天地有心試冰雪龍蛇偶蟄驚霆雷

今人爭繞月觀樹往日誰踏僧廊苔  
廿四橋邊萬花海我無暇去翻遠來  
名姿往往寄幽獨相賞故不從塵埃  
疑是仙人萼綠降返魂自得真香催  
惜無酒酌花前杯參橫月落人空回

送謝薌泉漕使

梅花始發與君遇芍藥開時君不顧  
一春二十四番風爲送君來送君去  
春江水綠落花多南浦傷心可奈何  
別有歌聲忘不得汪倫情似潭千尺

三月廿九日與客篠園看芍藥

今年春工百二十

閏二月也

一春孤負到今日勞人眼中春

更疾頗聞婪尾紅芳開我猶不飲花應猜餞春豈可無  
尊疊虹橋總是行雲處篠簞卻被花圍住面面窗扉彩  
霞護花上星光罩銀燭花閒露氣傾紅麴春到此時百  
分足請君惜此春足時明朝風雨安能知揚州黃九鬢  
易絲

趙忠毅公鐵如意歌

一抹烏雲展書案其光隱約星文亂捫之凜凜寒生風  
氣奪奸邪起庸懦銘辭自刻忠毅名趙公當日何錚錚  
揚清激濁太操切宵小矢志爭相傾天下三君比漢季  
誰能長令公如意東林西廡門始分白馬清流禍方熾

此器摩挲在公手雁門西去相從否唾壺盡缺心可知  
烏角生還夢何有趙公趙公百鍊身此名此器磨不磷  
當時鑄盡六州鐵大柄如何倒與人

長至後四日題襟館消寒小飲會者十四人以刺  
繡五紋添弱綫吹葭六管動飛灰分韻得紋字

記得分箋寫凍雲

去年消寒會分賦雪詩

又看呵硯散冰紋天涯

歲月憐新鬢漢上風流仿舊聞諸道久勞橫海將五谿  
猶駐伏波軍

時方捕海盜湖南苗匪亦未平

不能雪夜從擒賊空策書

生翰墨勳

鐵簫吟消寒席上賦

我得南星鐵如意狂歌水仙愁擊碎世閒何物堪倚聲  
竹管匏笙不能吹鐵崖嘗篆雙鐵龍雌龍入海招其雄  
千年千鎔兩俱化至今怒吼吳江風玉鸞也復無消息  
曾照廣陵秋月白廣陵鍛工摹影來白鸞毛羽今變黑  
蕪城雪後風正饗寒冰一條吾手操彈指連珠五星見  
當頭明月三天高便欲招呼簫史輩翩然彩鳳同游翱  
元雲之曲應天籟世俗絲管空惆悵如意從今得朋麇  
以之按拍聲相應池上蕤賓方響飛江東高唱銅琶競  
此際官梅有芳信吹徹簫聲花欲迸君不見道人鐵腳  
誦南華宰相鐵心能賦花

寶雨詩集卷之二  
題袁簡齋前輩二圖

隨園雅集圖

我後公生四十有三載  
夏卅五年識丰采  
公嘗過我來  
題襟對酒當歌壯心在  
知公白下園林閒  
隔江似望三  
神山仙源有路不可入  
但聞簪時漁者曾往還  
雅集流傳在圖幅  
圖中人尙鬚眉綠  
今日疑公隔世人  
巋然一老靈光獨閒居  
奉母方壯年  
當時四客誰能然  
山陽隣笛徒多感  
閣道轅駒亦可憐  
我有白髮親家園  
不能住兒方羈一官  
歸隱定何處  
隨園山水人間多  
柰少福命如公  
何我今年甲  
雖鼎盛校公解組之歲  
三載先蹉跎

公以三十三歲致仕  
予今年已三十七

給假歸娶圖

郎君筮領春風意老伴今同白雪顛事在乾隆登第日  
圖開嘉慶紀元年篋中宮錦花應舊紙尾詩人墨又鮮  
轉眼看公重策馬瓊林去會大羅仙  
今歲丙辰夏越二年公卽重赴瓊林宴矣

簡齋前輩贈所藏文信國公綠端蟬腹硯賦謝四

十四韵

硯修廣各三寸餘受墨處微凹底圓而凸象蟬腹沿左邊至頂刻謝皋羽銘其文云

文山攀髯之明年疊山流寓臨安得遺硯焉憶當日與文山象戲譜玉簫金鼎一局石君同在座右銘曰洮河石碧於血千年不死衰宏骨款識皋羽二字行書極瘦逸簡齋貯以檀匣而識其原委於

匣蓋云乾隆丁未十二月杭州臨平漁父網得此  
硯於臨平湖王仲瞿居士舟過相值知爲文文山  
故物以番錢廿圓得之轉以見贈余仿竹垞詠玉  
帶生故事爲作匣兼招詩流各賦一章甲寅六月  
望日袁枚記於小倉  
山房時年七十有九

先生去年來蓮葉手親摘灑我筆端露田田翠欲滴

歲去

承贈自製  
蓮葉硯

先生今復見謂此非難得藏有古忠肝千年

不磨泐爲子鄉先賢遺物子當惜捧函亟拜嘉開函慘  
寒色洮河玉一片三寸方以直乃是趙家土黯澹天水  
碧旁有謝翱銘云此屬信國文山旣攀髯疊山孤作客  
獲此於臨安兩忠合精魄曾記幕府中參軍鬪象奕嘗  
譜信公譜

皋羽所謂譜玉斲金鼎一  
局卽信公所造象戲也

石君時在側公今



作萇宏碧血凝此石冷映冬青樹西臺慟何極疊山旋  
盡忠石君渺輓迹前年臨平湖漁者忽網獲得無兩公  
死石君亦自溺有若齊田橫蹈海人五百蛟龍不敢侵  
終占完趙璧石而微作窪石腹蟠且碩兩翼常分張象  
蟬有高格吁嗟如信公螳螂捕苦迫南冠已除貂元鬣  
自蕭瑟聽琴蔡邕心在獄駱丞什無枝可任飛有粟焉  
官食指南一錄在悲憤灑遺墨所由晞髮子睹物歎疇  
咎公譜象戲圖其勢凡四十始玉簋金鼎終單騎見賊  
局必辨奇正機必審虛實同時周子善與劉淵伯往往  
戰則克一旅宋不興空阬竟被執翳豈戰之罪天意蓋

難逆玉薏旣不歸

玉薏文公所居山名

單騎空論敵

謂文公赴泉亭北營事

斯圖遂成識公事一生畢痛哭朱鳥魂硯當如意擊聞  
公玉帶生張憲有稱述近者朱翰林長歌重歎息乾坤  
畱清氣復此羽化質此硯入隨園遭逢亦詩伯如何猥  
相貺無以稱嘉德感同袁史公蟬硯贈庾翼

金陵報恩寺塔院作

明成祖所造卽古長干寺也

緇衣開國來緇衣遜國去奪國誰元勳亦因和尚誤有  
明丁殺運佛乃與其數火宅燒衆生大乘不能度云何  
造浮圖曰以報恩故斯時成祖心豈眞由孝慕自咎大  
姦雄君親有不顧惟與說因果貪嗔變恐怖茲寺古長

千蕭梁設食處生平篡弑孽欲仗佛天護而況靖難時  
無辜慘刀鋸懺悔期區區地豈惜金布一塔四百年相  
輪尙完具僧言月黑夜啾啾聞鬼語

雨花臺

天花雨落果如何飄瞥南朝一刹那浩劫到時棲鴿少  
高僧去後野狐多焚修誰更逾梁武功德終難語達摩  
怪底茲臺仍舊迹萬年宮觀掩蓬科

登清涼山翠微亭懷古

吳帝鳴鑾此上層東南形勝了無憑長江至竟非天塹  
王氣何爲見秣陵地入中原軍壘毀俗猶前代妓樓增

孤亭那不供臨眺古意茫茫我忺登

隱仙菴題壁

清涼臺有清涼界聞道通明此寄輓龍虎巖巒迴碧落  
齊梁煙雨積青松琴聲髣髴谿邊石丹氣霏微閣外峯  
獨恨先生誤朝士競談元理爲渠儂

莫愁湖

南朝天子本無憂一水名猶僭莫愁明祖偏能輕賜予  
仍孫終竟擅風流

夏夜龍潭道中作

月色逗東嶺雷聲殷上聲西峯行行天際雲蕭蕭葦間風

隔江知有雨涼氣吹孤篷向來赤日林化作煙冥濛不  
知何草香時復聞露叢煩襟忽水澹曠矚隨天空平生  
愛清景所得惟客中趣塗未覺遙金山已晨鐘

流水

流水到今日古時經幾何影畱青嶂在春送落花多橋  
板年年換舟人續續過爭如坐磐石風雨一漁蓑

簡齋前輩八十生日以詩爲壽

碌碌如庸人百歲有何益營營若勞者千春亦虛擲迺  
若言詩家工者例窮迫又云鉤物情未老髮先白清福  
與盛名兩美不兼得天命巧酌劑此豐而彼嗇異哉隨

園叟今世生使特享名六十年爲樂三萬日日日繫以  
詩不減長慶集文章有天幸繫豈盡人力我似會昌人  
尙見香山客

龍山慈孝堂歌

宋末歙縣鮑氏父子遇賊龍山松樹下雨爭死  
以求一全賊兩釋之其後嗣會建慈孝堂奉祀  
久傾圯今封翁誠一重修繪圖請題

白翎雀來天水碧十三陵血鵲嘯赤武林龍山荆棘中  
何況新安一片石新安山下松青青鮑家父子茲避兵  
黃巾赤眉嘯餘黨眼中白骨堆縱橫俯者如橋仰者梓

不望兩全但爭死松聲慘澹嘯聲哀天日無光草山紫  
山風曾灑當時淚山木已凋前代翠祠堂有構到宗祏  
圖畫流傳同史事嗚呼萬松嶺上斜陽殷父子龍髯誰  
爲攀南渡湖山如繡錯兩宮遺恨不生還

題朗齋所藏畫蘭時赴楚南戎幕

君抱離騷千古意翻然去上洞庭舟試看湘雨湘煙裏  
眞態生香似此不

題句曲女史佩蘭圖

蒼梧千古恨帝子泣芳魂化作湘江草其心有淚痕孤

清看畫本

女史嘗畫蘭

騷怨得詩源今又披圖幅因知性所

存

題嚴鉦畫卷

潮落一江寬  
風搖草閣寒  
夕陽帆影亂  
秋樹葉聲乾  
此境何人占  
清暉對客看  
嚴陵歸隱後  
潑墨寫嚴灘

嚴以巡檢

告休

贈尤山人蔭

伊人不官亦不娶  
曾入王門復辭去  
歸來無地蓋把茅  
卻僭僧房作常住  
僧房何有有茶具  
石銚千春貯風露  
君所居名石銚山房  
以有坡公故物也  
枯腸日以寒泉澆  
肝肺槎枒籜龍  
怒君於山水花鳥皆  
工而寫作尤妙  
偶然揮寫如有神  
寫成不肖輕贈



人題襟館中得一幀煙雨疑在湘江濱昨者炎威正六月汗蒸如雨空吟呻楚頭兩竿忽吹到灑然羅袂當蕭辰三十年來數畫手秀水侍郎當舉首謂錢籀次之吾愛潘恭壽與羅聘意趣都唯古人有侍郎仙去忽已久蓮巢盛年何不壽存者兩峯又北太江南風物君收取兩峯寥落亦可憐寄迹蕭寺今幾年兩峯寓京師觀音禪院與君同遭俗眼白盛名之下將無然咎賢常苦世議隘眞學難禁他時傳富貴中人復良苦如君蕭散仙乎仙

題明人宮娥乞巧圖

新月微黃露華白樓臺迴與明河直一縷鑪煙裊空碧

諸仙綽約當風立何代宮娥乞巧夕神光奕奕瞻九霄  
鬢蟬飛動顰蛾嬌人語不聞衣帶飄冰肌此際愁單綃  
別有深房銀燭燒銀燭相看兩神女似說姮娥常獨處  
但見明河不見橋雙星今竟在何許窗外梧桐滴殘雨

送退菴之粵西

才人常下第此地往來多送汝浮湘水將詩弔汨羅賊  
氛猶未盡旅鬢復如何竊恐書難寄衡陽雁不過

新雁

今汝何之江上寒楚天愁思正漫漫水漲碣澤哀鳴起  
兵阻衡陽過太難幾處稻梁逢樂歲誰家書信寄征鞍

爲伊此日關心甚不覺霜華上鬢端

寶應縣景賢書院二十四韵

汜湖詩客至

王少林

爲述長官賢

寶應孫令

廣學開書院遺基

得畫川

畫川爲喬侍讀縱耀園舊址

園林全在水賓客散如煙老樹

鴉猶噪空梁燕自翻模黏題壁字想像看花筵過墓喬

公語還山太史篇

竹垞檢討有送喬舍人還寶應詩

萬金家盡落數畝

地仍偏堂構新三架風流近百年咎時歌且舞今日誦

兼絃父母斯民責江淮耆舊傳人文宜可繼世澤亦何

延頗有豪家第宣無富窟錢奉誠思將帥梓澤弔嬋娟

沁水門庭改烏衣姓氏遷子孫常笑拙于奪祇憑權衰

盛洛陽記生存曹植憐石林真幸矣魯殿故巍然不化  
昆明燼猶鋪博士氎衣冠看起後禮樂憶開先縱權圖  
曾展子嘗題縱權園舊圖低徊翰墨緣

安東渡河有感

片片冰漸下急湍搖搖城樹出旌竿濟川舟楫知何術  
攬轡澄清媿此官瓠子方愁冬日柏哀鴻可柰朔風寒  
更聞羣盜連襄郢河上

王師未解鞍

郁州山吟

在海州一名雲臺山

嘗聞三神山船舫輒引還我今策馬直上扶桑顛東海

揚塵信如此人生霜鬢何由元

山本在海中近時海徙遂爲陵陸

山半

天風浩呼洶我身忽與山俱湧人言海徙千丈餘巖石

猶爲怒濤動九龍蜿蜒出雲際

山中有九龍淵

草木餘腥帶潮

氣當年鼇戴尙欲流秦帝飛橋豈能至霞梯爲我接金

闕爲我開迴首秦東門渺乎如瓊坏管爲絕島今近縣

盧生徐福眞凡材夜就三元殿前宿星辰逼近虛堂肅

簫鸞笙鶴忽滿空絳節霓旌隱紛屬仙官此時朝帝所

傳爲三官兄弟示現於此

海底雲霞爛初旭不知下界方何如擾擾

浮生夢猶熟浮生一夢成古今蓬萊之波漢復滌山上

定生不死藥逝當荷鍤窮幽尋仙官兄弟知我心

蔣師退同年來以尊甫攜二子游廬山圖見示感

題卷尾

君家成此圖乾隆歲戊戌更十有九載我方得省識君

悲弓冶存復歎人琴失感我情一致披圖慘遺墨

中有先君

題君隨尊先公躡屐匡廬時我亦過彭蠡趨庭向京師

僕以戊戌年由大江北上省侍先君

馬當三日風船駛不得維雲中望五

老一一蒼鬚睂柁轉峯數變真面終莫窺匡君坐笑客

咫尺空相思不知絕壁上新有三游詩入都見兩翁來

往無定期兩家兄若弟撰杖時肩隨君真太邱子我媿

荀淑兒人事忽乖隔流光至今茲鉛山少微星歷下墮

淚碑南雲雁行斷朔雪鴿原悲遭家何相似相見唯涕  
洩風燈太飄忽書畫空畱遺君猶有仲兄唱和成填篋  
詞源爭倒瀉還似雙瀑奇我如天柱峯孤聳愁傾欹

秦夫人良玉錦袍歌

蔣師退繪真  
像於冊屬題

冠花冠衣鐵衣寶劍在腰旗手揮英姿颯爽類褒鄂乃  
是勝朝石砭宣撫之熒嫠嫠也熒熒不恤緯要從敗局  
安神器姓同叔寶眞將門名似寧南較生氣當時千百  
總兵官若箇男兒共忠義子孫轉徙居南昌傳有錦袍  
猶疊箱寶客見之不敢拂圍花黯慘疑生茫想從披袍  
止馬日白桿隊裏天人出瞿塘峽口江風吹桑木關前

陳雲溼長槍舞動花滿身滿身梨花槍轉急廿年戰血  
痕常新蟒衣玉帶伊何人迴文底用誇蘇蕙金鎖將母  
誤馬眞明季無君能將將夫人不畫雲臺上如今片紙  
寫眞像悲風蕭蕭氣猶壯吁嗟乎唐家公主佐開國誠  
節夫人終退賊奈何孤掌仗巾幗力盡一絲補袞職海  
圖舊繡今雖完祇與衛公故物同傳觀

上方寺看梅

山門掩修竹殘雪在庭陰此地罕人到梅花香獨淡僧  
畱前世臘客感去年心小飲亦成醉裊裊月滿林

瓜州登大觀樓記所見



樓前破浪嘗鼓楫樓上旌竿望中出平生意氣豪登臨  
風利帆飛竟何及夜來怒噫阻瓜步曉起荒城拾苔綴  
振衣忽向三霄摩俯首偃同衆山揖蕭公北顧此南望  
六代煙嵐盡收拾是時海門初上日西北浮雲飛倏集  
江天瀕洞如黃昏一綫電光吐還翕雷聲撼崖崖欲走  
雨勢掣水水皆立潮汐疑爭赭龕放金焦恐作羅浮合  
喬柯併力猶壅壅浮圖裊空頗岌岌不知鬼神何往來  
祇覺乾坤徧霑溼大檣森竦餓鴟叫小艇低昂浴鳧入  
樓中立腳愁傾欹衣袂輕吹向江急反看僕從色黯慘  
警欬無聲但噓吸方春二月發陽氣宜有蛟龍欲啟蟄

我來相值亦偶然窮此大觀記篇什

贈武德騎尉呂堰驛巡檢工君

翼孫殉難詩

朝廷恩加二等敝血衣歸葬王巡檢巡檢魂猶衛呂堰  
襄陽賊退魂可招弓兵尋輓指大橋血流橋下風蕭蕭  
家書數紙父先得兒與居民共謀賊謀賊不勝死無憾

寄題京口張氏飲綠山堂

招隱山前隱君宅江煙江雨爲君碧衣邊花氣鶴林春  
枕上潮聲海門夕海門日出山窗炯窗北高眠人未醒  
有時戲綵母馨蘭無事傳箋妻賦茗人生此樂不可無  
人生此願誰能如我欲閒居奉白髮至今未築山中居

且將就子飲山綠他日茅容與具蔬

題顧閔中畫韓熙載夜宴圖

上前誰撫內人手絕纓故事當時有何怪臣家妓行酒  
教坊使賜侍郎宅家山唱徹紅羅壁何怪臣家六么拍  
六么舞者王屋山舍人鼓聲高下閒別按胡琴出纖指  
嘉明女弟低雙鬟其餘凝酥素質輩鬢雲蒨荀香成隊  
羅衣半解身欲迴翠袖潛牽語疑穢陳致堯耶朱銑耶  
履綦雜逕冠欹斜歌聲不使笑聲遏樂句尙有門生拏  
此時銀燭方搖春四筵無復分主賓豈知方朔在窗底  
不怕隙風吹眸子明朝寫入澄心紙傳徧江南十州矣

淺斟低唱笑黨姬蠟淚成堆傳柘枝人生行樂視遭際  
此公樂意誰能知樂意方長夜苦短金鈴破後無絃管

自京口至金陵雜詩

渡過西津綠野長雜花飛趁馬蹏香太從冷雨疏煙裏  
一路看山到建康

鉦鼓喧喧羽節紛逢人都太賽茅君一痕青出遙天外  
知是華陽洞裏雲

龍潭舊是戰爭場守將從來祇乞降

明靖難兵從此進  
攻都督僉事陳瑄

帥師請降癡絕他時馬瑤草猶言天塹有長江

大清兵已由龍潭進而

士英尚  
作此語

白門柳色冶城花  
六代茫茫感物華  
那更鍾山山下路  
清明人賣孝陵瓜

秦淮樓閣影新波  
江燕初歸識舊窠  
怪道桃花零落盡  
秣陵風雨一春多

秉簡修禊舊年光  
寂寞無人朱雀航  
一片南朝煙月地

三春見雪似漁陽

打槳莫愁湖上過  
湖中人唱使君歌

湖爲前太守李公  
松雲所開製有莫

愁湖春來兩岸青青柳  
知爲誰牽別恨多

本年曾展隨園畫  
今日纔尋詩老家  
文室維摩方示疾

猶能妙語落天花

簡齋前輩扶病相見示  
以病中新詠並論詩學

擬錦石擣流黃

時時聞捷音誤妾到而今衣度減復減石痕淡更淡涼  
風生樹角殘月過庭心征人試開篋淚點見盈襟

擬襄陽蹋銅蹶

襄陽白銅鞮人太歸何時儂似峴山石常銜千歲碑  
種蓮黃蘗浦藕根何太苦昨來風雨多漂蕩無處所  
送歡下揚州莫向巴東去風波灩澦堆歌吹竹西路  
襄王一生樂常在夢魂中襄王夢醒後雲斷巫山峯  
昔日大隄花今作大隄土縱使歡能來不識看花處  
人言襄陽樂爭唱白銅鞮不如逐歡去同作揚州兒

端午見懸天師像作歌

火德方炎日當午誰倡妖言作鬼語煽動鄉間小兒女  
某家神降某家蠱爭晝天師供堂廡赭袍生火顏渥丹  
森森赤髮衝其冠威光有赫不可干皆言來自龍虎山  
四海一日驅神姦天上六丁聽分布卻忘咎日修真處  
劍閣潑山漢江路野魅呼風狐嘯霧赤靈符篆安得靈  
憑何續命彩縷輕歲除亦挂鍾馗像墟墓有人逢鬼兵

蒲劍行

蒲劍碎邪疑有神此風傳自荆楚云吾嘗其說不雅馴  
意者義取哀靈均楚塵大阿曾勝軍懷王不能西擊秦

又不用之誅佞臣利器埋匿鉛刀珍靈均懷芳若芷薏  
王也不分猶與薰服艾卻惡蘭當門放棄乃與山鬼隣  
王復闇投魑魅羣恨不拔劍防君身身葬魚腹情未申  
化爲紫氣衝星文楚人傷之與招魂五月五日椒醑陳  
桂旗髣髴來江濱一江香草皆悽愴此時蒲葉聊可紉  
其氣郁烈如其人

觀宋人畫謝康樂出浴圖輒題數句

公旣坐塗炭幡然思潔身不聞周盤語溺水母溺人憶  
公帆海嘗淹宿萬里之流堪濯足豈知躡屐歸故山還  
慶彈冠及新沐



贈章實齋國博

章公得天秉羸紉迴殊衆豈乏美好人此中或空洞君  
貌頗不揚往往遭俗弄王氏鼻獨臚許丞聽何重話仿  
仲車畫書如洛下諷又常患頭風無檄堪愈痛沉乃面  
有癥誰將玉璫礪五官半虛設中宰獨妙用試以手爲  
口講學求折衷有如遇然明一語輒奇中古來記載家  
皮置可充棟岐路互出入亂絲鮮穿綜散然體例紛聚  
以是非訟孰持明月光一爲掃積霧賴君雅博辨書出  
世爭誦筆有雷霆聲旬旬止市閭續鑑追溫公選文駁  
蕭統乃知貌取人山雞誤爲鳳武城非子羽誰與子游

其感君惠然來公暇當過從

寄題泐梧門祭酒詩龕圖

佛有文字何嘗空其空乃在無不容沙門八萬四千泐  
皆入不二爲真宗詩家往往偕禪喻此道亦復多神通  
飛騰綺麗才百變鏡象一語安能窮紛紛宗教異南北  
惜不大會參其同泐公獨具正泐眼萬泐盡納虛龕中  
誰居廊廡誰入室妙慧所觸皆圓融雖然豈無外道逢  
野狐魔障愁交攻願公持律務嚴謹庶爲大雅宣遺風  
我詩比者少精進身落塵境心俱蒙安得同龕與密證  
猶能一指傳天龍

苦茶僧詩贈吳竹虛

人生嘗世味甘苦各自知蓮或苦於心茶或甘如飴蜂  
常醉於花釀蜜知爲誰蟲常集於蓼茹苦能安之人情  
甘易入否則生怨咨酒渴逢麴車不免饞涎壘達觀齊  
萬物始笑斯人癡食蔗境不佳何如橄味回美痰有甚  
惡藥石眞良醫吳公得禪理苦行力自持百味如嚼蠟  
但以茶療飢枯腸日澆灌清氣融肝脾有時出芒角寫  
畫兼賦詩閭浮大千界萬象供發揮笑他膏粱子何乃  
負腹爲我咎見君作千里常相思我今與君交知君好  
襟期庶幾澹以成臭味無差池

梁谿詩家

無錫顧晴沙觀察選其鄉人歷代詩梓之曰梁谿詩鈔文學賈崧請以棄稟函

瘞錫山之麓爲詩

家乞詩紀其事

梁谿先代賢墓草半荒翳試循錫山原誰得辨碑記顧  
侯選詩出死者有生氣餘橐若暴齒忽下賈生淚披沙  
揀兼金沙亦可用礪壓糟飲其醇糟粕仍酒味況乃收  
琴材竊恐爨下棄古今鹽車下豈必乏騏驥此橐或覆  
甌又或投諸廁古人如有知銜冤到九地賈生具茲心  
援以文冢例請得之顧侯封函入大隧申浦何清瀟錫  
山何峭翠咎或有客死今乃得聚瘞定唱鮑家詩來臨  
閩仙祭賈生前世身當卽家中士叶尋常富貴家閩代

墓常廢子孫有不知何論過客昧此道終不絕此冢宜  
不做梁谿後起人皆得稱法嗣

和蔣師退食烏他

素食年來此地容蒹蕢鹽豉習吳儂憶曾

紫禁霞

恩賜驚見瓊膏出尙饗荆楚百城徽餉急索倫千騎裹  
糧從軍中屢有單醪惠上嘗賜軍營將士乳餅望汝勦勞報  
九重

題白菴鄧尉撥梅圖

前年梅花嶺花發君已去君去過吳門卻被花畱住想

黃雨茅屋詩集卷之二

辛酉補刊

當踏雪時憶我尋春處

君不石湖耕我不西谿漁各有畫中樹春風常負渠相  
看頭欲白頭白將何如

賞雨茅屋詩集卷之二終